

NGA MOANA O TE ARAWA.

KUA PUTA TE £6,000 TUATAHI.

TE HUI A TE POARI.

Tari a Te Kooti Whenua Maori,

Rotorua, Maehe 27, 1924.

I TU te hui ate Poari o Te Arawa i te 2 o nga haora i runga i te panui a te Minita Maori. I tae katoa mai nga mema. 1. Ko Tiweka Anaru Kai-Rehita o te Kooti Whenua Maori te Tumuaiki o te hui Nana i panui:

(a) Te panui a te Minita karanga i te hui.

(b) Te pukapuka whakatu a te Kawana Tianara i nga mema o te Poari.

I tono ia kia whakaingoatia he Tiamana mo te hui Poari.

2. Na H. McPherson i motini na Raureti Mokonuiaranga i tautoko, "Ko H. T. Mitchell hei Tiamana mo te Poari." Kaore he tangata ke i whakaingoatia, kua ana kia tu a H. T. Mitchell. Ka mihi ia ki te Poari a ka eke ki te nohoanga o te Tiamana.

3. Na H. McPherson i motini na W. Tamati i tautoko: "E mihi ana tenei Poari kia Kapene Mea kia Hon. A. T. Ngata kia F. Earl kia R. Levin mo a ratau mahi ki te tautoko i te Keehi a te Arawa mo nga moana a tae noatia tona tutukitanga."—Whakaaetia ana.

Ko te Hon. A. T. Ngata o enei i konei a i whai kupu ia ki te Poari. Ko nga take hei mahinga mana i tenei wa ko nga kaupapa hei whaaingai nga ra e heke iho nei. Taana ki ko te kupu kaha o te Ture nana i whakaoti te keehi o nga Moana, ko te kupu e whakaatu nei, kei te Poari te mana hei tino whakatau he aha nga take tika hei whakapaunga mo nga moni, kei roto i tona ringa e pupuri ana, na tena kupu i tino whakaeke te kawenga tino taimaha ki runga ki te Poari, a ma te ahua o te whakahaere a te Poari e tutuki pai, e he ai ranei te kaupapa o te moni a te Arawa.

4. Na Kepa Ehau i motini na Raureti Mokonuiarangi i tautoko, "Me tuku he kupu tohutohu a te Poari ki te Minita kia whakaturia ko Tiweka Anaru hei Apiha haina haki i raro i te rekureihana 25 (2)."—Whakaaetia ana.

I patua tonutia atu he waea ki te Minita Maori whakaatu i tenei motini.

5. Na H. McPherson i motini na Rev. Waaka i tautoko, "Ko te tauira o te Hiiri e mau ake nei me whakaae a me tuku atu ki te Minita Maori kia whakamana mai."—Whakaaetia ana.

6. Na Raureti Mokonuiarangi i motini na Wirihana Tamati i tautoko, "Ko Wiremu Ereatare hei Waihi Tiamana." Na Kepa Ehau te menemana na H. McPherson i tatoko, "Ko Te Morehu Te Kirikau hei Waihi Tiamana." I runga i te whakahipanga a Te Morehu Kirikau i tona whakaingoatanga ka unuhia te menemana kawhakaaetia te motini.

7. Na H. McPherson te motini na Aperahama Wiari i tautoko, "Ko Raniera Kingi hei Hekeretari mo te Poari a me maunu hoki ia i tona tuunga mema."—Whakaaetia ana.